
Resolución de 1 de xunu del 2022 pola que s'aprueba la convocatoria de subvenciones a medios de comunicación pa la normalización social del asturianu y, nel so ámbito, del gallego-asturianu, en réxime de concurrencia competitiva

RESOLUCIÓN

Analizao la documentación que consta n'espedito AYUD/2022/9685, de convocatoria de subvenciones a medios de comunicación pa la normalización social del asturianu y, nel so ámbito, del gallego-asturianu, en réxime de concurrencia competitiva, tramitáu al amparu de la Llei 39/2015, de 1 d'ochobre, del Procedimientu Alministrativu Común de les Alministraciones Públiques, resulten estos

ANTECEDENTES DE FECHU

Primero.- L'Estatutu d'Autonomía del Principáu d'Asturies y la Llei 1/98, de 23 de marzu, d'Usu y Promoción del Bable/Asturianu señalen como competencia del Principáu'l fomentu y la protección del asturianu nes sos distintes variantes que, como modalidaes llingüístiques, s'usen nel territoriu del Principáu d'Asturies, amás del gallego-asturianu nel so ámbito. Ente les midíes específiques de promoción figura la convocatoria de subvenciones o ayudes que dexen impulsar l'usu del asturianu y del gallego-asturianu n'iniciatives particulares, empresariales o asociatives y, en xeneral, como vehículu d'espresión cultural.

Segundo.- La xestión de la política llingüística ta incardinada n'ámbitu de la Consejería de Cultura, Política Llingüística y Turismu en virtú de lo dispuesto en Decretu 86 /2019, de 30 d'agostu, pol que s'establez la estructura orgánica básica d'aquella.

Tercero.- Por Resolución de la Consejería d'Educación y Cultura de 13 de mayu del 2016 (BOPA de 9 de xunu del 2016) aprobáronse les bases reguladores de subvenciones a medios de comunicación pa la normalización social del asturianu y, nel so ámbito, del gallego-asturiano, en réxime de concurrencia competitiva (n'adelantre, bases reguladores de 13 de mayu del 2016).

Cuarto.- El Plan Estratéxicu de Subvenciones pal periodu 2020-2022 aprobóse por Resolución de 18 de febreru del 2020, de la Consejería de Cultura, Política Llingüística y Turismu (BOPA de 27 de febreru del 2020) y foi oxetu d'una quinta modificación por Resolución de 18 de febreru del 2022, de la Consejería de Cultura, Política Llingüística y

Turismu (*BOPA* de 1 de marzu del 2022), que'l so Anexu I incluye la llinia de subvenciones a medios de comunicación pa la normalización social del asturianu y, nel so ámbitu, del gallego-asturianu.

FUNDAMENTOS DE DERECHU

Primero.- La Llei 38/2003, de 17 de payares, Xeneral de Subvenciones (n'adelantre Llei 38/2003, de 17 de payares), establez n'artículu 22 que'l procedimientu ordinariu de concesión de subvenciones ha tramitase en réxime de concurrencia competitiva, quier dicise, cola aprobación de la convocatoria pública correspondiente, depués de l'aprobación de les bases reguladores de la mesma. Amás, el Decretu del Principáu d'Asturies 71/1992, de 29 d'ochobre, pol que se regula'l Réxime Xeneral de Concesión de subvenciones (n'adelantre, Decretu del Principáu d'Asturies 71/1992, de 29 d'ochobre), establez nos artículos 6.2 y 7 que l'otorgamientu de subvenciones innominaes y xenériques n'ámbitu de la comunidá autónoma del Principáu d'Asturies ha realizase pente medios de convocatoria pública, depués de l'aprobación de les bases reguladores de la mesma.

Segundo.- La competencia p'aprobar les bases y convocar la concesión de la subvención correspuende a la Consejería de Cultura, Política Llingüística y Turismu d'alguerdu colo dispuesto n'artículu 38 de la Llei del Principáu d'Asturies 6/1984, de 5 de xunetu del Presidente y del Conseyu de Gobiernu, en rellación col Decretu 86/2019, de 30 d'agostu, pol que s'establez la estructura orgánica básica de la Consejería de Cultura, Política Llingüística y Turismu.

Tercero.- L'autorización del gastu ye competencia de la persona titular de la Consejería de Cultura, Política Llingüística y Turismu en virtú de lo estableció n'art. 41 del Testu Refundíu del Réxime Económicu y Presupuestariu, aprobáu por Decretu Llexislativu del Principáu d'Asturies 2/1998, de 25 de xunu, en rellación cola Llei del Principáu d'Asturies 6/2021, de 30 d'avientu, de Presupuestos Xenerales pal 2022.

Cuarto.- La Llei 38/2003, de 17 de payares, afita nel so artículu 23.2 el conteníu mínimu de les convocatories aprobaes pol órganu competente.

Quinto.- Esta convocatoria, desque dirixida a entidaes que desenvuelven actividaes económicques, atópase suxeta al Reglamentu (UE) n.º 1407/2013 de la Comisión, de 18 d'avientu del 2013, relativu a l'aplicación de los artículos 107 y 108 del Tratáu de Funcionamientu de la Unión Europea a les ayudes de minimis (DOUE L 352, de 24/12/2013), norma esta d'algame xeneral, aplicable directamente y obligatoria en tolos sos elementos.

Sesto.- Existe creitu afayadizu y abondu na aplicación presupuestaria 18.04.422R.472.012 de los Presupuestos Xenerales del Principáu d'Asturies pal 2022.

Polo tanto, vistos los preceptos llegalos mentaos y demás d'aplicación xeneral, pola presente

RESUELVO

Primero.- Autorizar un gastu destináu a esta convocatoria, por importe de CIENTU DIEZ MIL EUROS (110.000,00 €), con cargu a l'aplicación presupuestaria 18.04.422R.472.012 de los Presupuestos Xenerales del Principáu d'Asturies pal 2022.

Segundo.- Aprobar la convocatoria pública de subvenciones a medios de comunicación pa la normalización social del asturianu y, nel so casu, del gallego-asturianu, en réxime de concurrencia competitiva, que va llevase alantre d'alcuerdu coles prescripciones que s'indiquen de siguío:

1.- Oxetu

1.1. Esta convocatoria tien por oxetu la concesión d'ayudes económiques, en réxime de concurrencia competitiva, a empreses periodístiques, radiofóniques, televisives o d'Internet, poles inversiones realizaes na producción d'espacios onde s'use l'asturianu, o'l gallego-asturianu nel so ámbitu, bien davezu n'informaciones xenerales, bien n'espacios periódicos y fixos, bien en programes extraordinarios d'interés especial, pero siempre qu'esa utilización ayude a la normalización y dignificación del usu social de la llingua y que seyan espacios configuraos como propios del mediu de comunicación y asumíos por él.

1.2. Los proyectos subvencionables van ser los realizaos, amás d'a lo llargo del exerciciu d'esta convocatoria, hasta la fecha máxima de xustificación establecida nella, nos meses de payares y avientu del exerciciu 2021, siempre que nun se subvencionaren na convocatoria anterior.

Nun se va considerar subvencionable nengún proyectu onde nun s'establezan gastos directos, que son aquellos a los que se refier la Base V.1.

1.3. Queden escluyíos d'estes ayudes los folletos internos de les instituciones, les publicaciones de partíos políticos, asociaciones culturales y entidaes públiques.

1.4. Ensin perjuiciu de la posible presentación de dellos proyectos por cada solicitante, namás puen ser oxetu de subvención un máximu de trés de los proyectos presentaos. Nesi casu, van entendese automáticamente desestimaos los proyectos presentaos por una mesma solicitante que sacaren peor puntuación en comparanza colos sos proyectos meyor puntuaos.

2.- Réxime xurídicu

Ensin perjuiciu de lo dispuesto na Llei 38/2003, de 17 de payares y nel Reglamentu (UE) n.º 1407/2013 de la Comisión, de 18 d'avientu del 2013, relativu a l'aplicación de los artículos 107 y 108 del Tratáu de Funcionamientu de la Unión Europea a les ayudes de minimis (*DOUE* L 352, de 24/12/2013), esta convocatoria de subvenciones va rexise poles bases reguladores de 13 de mayu del 2016.

3.- Gastos subvencionables

Los gastos subvencionables van ser los establecíos na base V de les bases reguladores de 13 de mayu del 2016.

Los gastos indirectos del proyectu van ser subvencionables hasta un máximu del 40 % del presupuestu aprobáu, siempre qu'a criteriu de la Comisión de Valoración seyan necesarios y xustificaos pal so desenvolvimientu y s'estableza a les clares el porcentaxe d'imputación de los mesmos nel presupuestu presentáu.

4.- Requisitos pa solicitar la subvención y forma d'acreditalos

4.1. Va poder solicitar estes subvenciones cualquier empresa privada (persona física o xurídica) que seya titular d'un mediu de comunicación d'ámbitu asturianu y que tenga'l domiciliu social, establecimientu o delegación comercial nel Principáu d'Asturies. La empresa ha cumplir los requisitos establecíos na base III de les bases reguladores de 13 de mayu del 2016.

4.2. La solicitud ha presentase nel modelu normalizáu que s'atopa disponible na sede electrónica del Principáu d'Asturies (www.asturias.es), portal onde ta publicada la ficha de serviciu, que se va poder localizar introduciendo'l códigu [AYUD0064T01](#) nel buscador de cabecera (asitiáu na parte cimera derecha de la páxina) y na que se va atopar amás el testu íntegu de la Resolución de Convocatoria, les bases reguladores y información complementaria.

Ha presentase una solicitú por cada proyectu.

4.2.1. La solicitú tien que s'acompañar necesariamente de los documentos que s'indiquen de siguío:

— Nel casu de persona física:

- Copia del DNI (*).

— Nel casu d'entidá xurídica:

- Copia del NIF (*).
- Fotocopia d'escritura de constitución y les sos modificaciones. Si se solicita más d'un proyectu, esti documentu namás ye menester presentalu nuna ocasión. De toles maneres, si la entidá solicitante yá presentó primero la escritura en cualquier Alministración, nun tien la obligación de facilitar esta documentación, siempre qu'indique en qué momentu y énte qué órganu alministrativu lo presentó.
- Acreitación de la condición de representante a la fecha de presentación de la solicitú.
- Copia del DNI de la persona qu'actúe como representante de la entidá (*).

— Tanto les persones físiques como xurídiques han presentar en cada proyectu:

- a) Documentu actualizáu acreitativu de tar dada d'alta nel epígrafe correspondiente del IAE (*) y na Seguridá Social como empresa (*namás persones físiques).

El conteníu de la documentación presentao d'alcuertu con esti apartáu tien qu'acreditar que la entidá cumple coles condiciones pa ser beneficiaria d'estes ayudes, según lo previsto nel puntu 4.1.

- b) Documentación acreitativo de que la entidá solicitante tien el domiciliu social, establecimientu o delegación comercial nel Principáu d'Asturies (*).
- c) Ficha d'acreedores rellenada de manera correcta y tramitada pola entidá bancaria (namás cuando se solicite subvención del Principáu d'Asturies pela primer vez, o cuando hubiere dalgún cambéu que se tenga que señalar na mesma).
- d) Proyectu detalláu, qu'ha tener esti conteníu mínimu y imprescindible:
- Calendariu de realización y execución del proyectu. El proyectu ha tener como fecha máxima d'execución el 10 de payares del 2022.
 - Fueya anual d'audiencies o de divulgación, certificáu de ventes, documentu de control de visites nel casu de los proyectos web, o, n'otru casu, documentos indicadores que dexen constatar el grau de difusión del mediu.
 - Los proyectos de los medios de prensa escrita han dir acompañaos

de testos de muestra que dexen ver a les clares l'usu llingüísticu escoyíu, y han indicar númberu de páxines, siti d'inxerimientu, periodicidá, díes de publicación y inxerimientu, temática, estructura, tipu de maquetación, personal de redacción, collaboraciones y tola información que seya menester pa la concreción máxima del proyectu cola mira de valoralu.

- Los proyectos de les emisores de radio y televisión van poder acompañase d'una maqueta de muestra, y en tou casu han indicar planificación temporal, guión del programa o programes, duración de los espacios, díes y hores d'emisión, oxetivos del programa, temática, estructura de la programación, personal de redacción y collaboración, y tola información que seya menester pa la concreción máxima del proyectu cola mira de valoralu.
 - Los proyectos d'Internet han acompañase d'una muestra escrita onde se concrete'l mapa web, la estructura de la páxina, testos de muestra que dexen ver a les clares l'usu llingüísticu escoyíu, y tola información que seya menester pa la concreción máxima del proyectu cola mira de valoralu.
- e) Presupuestu equilibráu, qu'incluya les partíes que lu integren, recoyendo los gastos y ingresos de l'actividá pa la que se solicita ayuda, onde se recueya l'aportación económica de la persona o entidá solicitante pal desenvolvimientu de l'actividá (esta ha ser, polo menos, d'un 10 % del presupuestu total de l'actividá). Nel presupuestu ha facese constar l'importe de l'ayuda económica solicitada pol petitionariu, que nun va poder pasar del 90 % del presupuestu total del proyectu.
- f) Certificación acreitativa de que la entidá atópase al corriente de les sos obligaciones tributaries, de nun ser deudora cola Hacienda del Estáu, nin cola Hacienda del Principáu d'Asturies y del pagu de cotizaciones a la Seguridá Social (*).
- g) Declaración responsable de la persona que represente a la entidá, relativa a nun tar incurso éstas nes prohibiciones pa obtener la condición de beneficiaria, previstes n'artículu 13 de la Llei 38/2003, de 17 de payares, Xeneral de Subvenciones, y de que xustificó les subvenciones y ayudes concedíes enantes pola Comunidá Autónoma (incorporada al formulariu de solicitú).
- h) Declaración responsable relativa a otres subvenciones, ayudes, ingresos o recursos solicitaos y, nel so casu, concedíos pa la mesma finalidá, por cualquier Alministración Pública o entes públicos o privaos, nacionales o internacionales, con indicación de la entidá concedente, fecha y importe; nel casu contrariu, declaración de que nun solicitó nengún tipu d'ayuda pa la realización d'esta actividá (incorporada al formulariu de solicitú).

4.2.2. La presentación de la solicitú pola entidá solicitante va suponer, sacante manifestación espresa en contrario, l'autorización al órganu xestor pa recoyer la información correspondiente cola mira de verificar los requisitos anteriores marcaos con asteriscu (*). Si'l solicitante manifestare oposición espresa a la consulta o obtención al traviés de la ferramienta d'interoperabilidá ente les Alministraciones públiques de la documentación señalao enriba, va tener que lo presentar.

Si l'interesáu nun diere'l consentimientu nin tampoco presentare los documentos marcaos con asteriscu (*) acreitativos del cumplimientu de los requisitos mentaos, va ser causa pa riqui-y los mesmos, d'alcuertu colo previsto n'artículu 68 de la Llei 39/2015, de 1 d'ochobre, del Procedimientu Alministrativu Común de les Alministraciones Públiques (n'adelantre, Llei 39/2015, de 1 d'ochobre).

4.3. Amás de la documentación mentao n'apartáu anterior, d'alcuertu col artículu 6 del Reglamentu (UE) n.º 1407/2013 de la Comisión, de 18 d'avientu del 2013, relativu a l'aplicación de los artículos 107 y 108 del Tratáu de Funcionamientu de la Unión Europea a les ayudes de *minimis*, la persona o entidá solicitante ha presentar declaración, escrita o en soporte electrónicu, tocante a toles demás ayudes de *minimis* recibies nos dos exercicios fiscales anteriores y n'exerciciu fiscal en cursu que tean suxetes al Reglamentu mentáu o a otros reglamentos de *minimis*. Esta declaración tien que s'incorporar nel modelu de solicitú.

En nengún casu van subvencionase proyectos d'entidaes solicitantes nos que l'importe total de les ayudes de *minimis* concedies pase de 200.000 euros a lo llargo de cualquier periodu de trés exercicios fiscales.

5.- Comisión de Valoración y órganu competente pa la instrucción y resolución del procedimientu

5.1.- La Comisión va tar presidida pola persona titular de la Dirección Xeneral competente en materia de política llingüística o persona na que delegue, y integrada por un mínimu de trés y un máximu de cinco persones que van actuar en calidá de vocales, de les que polo menos dos han ser personal adscrito al órganu instructor y les otres van poder ser persones vinculaes al ámbitu de la llingua y cultura asturiana. Va actuar como Secretariu/a un empleáu públicu o una empleada pública con adscripción a la Dirección Xeneral competente en materia de política llingüística.

Nel casu d'ausencia o enfermedá, y en xeneral cuando se dea dalguna causa xustificada, los miembros titulares de la comisión de valoración han sustituyise por quien l'órganu competente nome como suplentes.

5.2.- L'órganu instructor va ser el Serviciu de Normalización del Usu de la Llingua Asturiana y Investigación, y el procedimientu va resolverse por resolución de la persona titular de la Consejería de Cultura, Política Llingüística y Turismu.

El plazu máximu pa resolver y notificar la resolución del procedimientu va ser de seis meses. El plazu va computase de magar s'espulice la convocatoria correspondiente.

Desque trescurra'l plazu máximu ensin recayer resolución espresa, les entidaes solicitantes van poder entender desestimaes les solicitúes por silenciu alministrativu.

6.- Plazu y sitiu pa la presentación de solicitúes

Les solicitúes han presentase nel plazu de 20 díes hábiles a cuntar dende l'otru día d'espulizase l'extractu d'esta convocatoria nel *BOPA*, según modelu normalizáu que s'atopa disponible na ficha de serviciu publicada na sede electrónica del Principáu d'Asturies (<https://sede.asturias.es>). Pa localizala va poder metese'l códigu AYUD0064T01 nel buscador de la cabecera (asitiáu na parte cimera derecha de la páxina).

Les solicitúes han presentase d'aluerdu col artículu 16 de la Llei 39/2015, de 1 d'ochobre, ensin perxiciu de lo dispuesto n'artículu 14.2 del mesmu testu llegal al respective de la obligación de rellacionase de manera electrónica pa los suxetos indicaos nél.

Si dalguna de les entidaes solicitantes obligaes a presentar la solicitú de manera electrónica la presenta presencialmente, va pidise que la subsane cola so presentación electrónica. A estos efectos va considerase como fecha de presentación aquella na que se fixere la subsanación, d'aluerdu colo señalao n'artículu 68.4 de la Llei 39/2015, de 1 d'ochobre.

Si la solicitú nun cumple tolos requisitos esixíos na norma de convocatoria, l'órganu competente va pidir a la persona o entidá interesada que la subsane nel plazu máximu y improrrogable de 10 díes, indicándo-y que, si nun lo fixere, va considerase que desistió del so pidimientu, depués de resolución que va tener que se dictar nos términos previstos del artículu 68 de la Llei 39/2015, de 1 d'ochobre.

7.- Procedimientu de concesión

7.1. El procedimientu de concesión de subvenciones va tramitase en réxime de concurrencia competitiva, na forma establecida n'artículu 24 de la Llei 38/2003, de 17 de

payares, coles precisiones conteníes na base XI de les bases reguladores de 13 de mayu del 2016.

La resolución del procedimientu va espublizase en *Boletín Oficial del Principáu d'Asturies*. Esa publicación va producir los efectos propios de la notificación, y esto d'alguerdu colo estableció n'artículu 45.1 y concordantes de la Llei 39/2015, de 1 d'ochobre.

Esta resolución pon fin la vía alministrativa y contra ella pue interponese recursu contencioso-alministrativu o, nel so casu, recursu potestativu de reposición qu'habrá interponese énte l'órganu que dictó la resolución.

7.2. Namás van poder recibir subvención aquellos proyectos qu'algamen o pasen la puntuación mínima de 51 puntos, por una cantidá máxima de 20.000 € por proyectu, y siendo'l 90 % el porcentaxe máximu subvencionable del presupuestu aprobáu axustáu.

7.3. Los proyectos van ordenase pola puntuación sacada, n'orde decreciente, de mayor puntuación a menor puntuación, estableciéndose una prelación ente los mesmos cola mira de determinar el porcentaxe subvencionable del presupuestu aprobáu axustáu, que va aplicase a tenor d'estos tramos de puntuación:

- Si'l proyectu saca ente 100 y 91 puntos, la cantidá de la subvención va ser el 90 % del presupuestu aprobáu axustáu.
- Si'l proyectu saca ente 90 y 81 puntos, la cantidá de la subvención va ser el 85 % del presupuestu aprobáu axustáu.
- Si'l proyectu saca ente 80 y 71 puntos, la cantidá de la subvención va ser el 80 % del presupuestu aprobáu axustáu.
- Si'l proyectu saca ente 70 y 61 puntos, la cantidá de la subvención va ser el 70 % del presupuestu aprobáu axustáu.
- Si'l proyectu saca ente 60 y 56 puntos, la cantidá de la subvención va ser el 60 % del presupuestu aprobáu axustáu.
- Si'l proyectu saca ente 55 y 51 puntos, la cantidá de la subvención va ser el 65 % del presupuestu aprobáu axustáu.

7.4. Cuando'l creitu autorizáu nun seya abondu pa financiar les cantidaes asignaes d'alguerdu colos criterios de valoración señalaos enantes, va amenorgase la cantidá de les subvenciones que se concedan, repartiendo'l déficit de financiamientu proporcionalmente a la cantidá asignada de primeres.

8.- Criterios de valoración

D'alcuerdu cola base X de les bases reguladores de 13 de mayu del 2016, la Comisión va evaluar los proyectos según los criterios marcaos nes mesmes y siguiendo esti desglose:

- a) Grau d'ellaboración, detalle y concreción del proyectu presentáu: hasta un máximu de 10 puntos, señalándose:
- Grau máximu, que permita una valoración óptima del proyectu: 10 puntos.
 - Bon grau, que permita una valoración destacable del proyectu: 7 puntos.
 - Grau abondu, que permita una valoración afayadiza del proyectu: 5 puntos.
 - Grau escasu, que permita una valoración mínima del proyectu: 2 puntos.
 - Grau nulu, que nun permita la so valoración: 0 puntos.
- b) Grau de tresversalidad na temática del proyectu: hasta un máximu de 20 puntos, señalándose:
- Proyectos sobre temátiques variaes: deportes, economía, sociedá, cultura, ciencia..., máximu de 20 puntos.
 - Proyectos sobre una temática concreta: máximu de 10 puntos.
- c) Adecuación a los oxetivos xenerales de normalización: va valorase nuna escala de 0 a 20 puntos l'adecuación del proyectu a los oxetivos xenerales de normalización del asturianu, atendiendo a parámetros como la xeneralización de la toponimia oficial d'Asturies, el desenvolvimientu d'actitúes positives al respective de la llingua autóctona, l'atención al públicu infantil/xuvenil, la difusión, etcétera.
- d) Presencia del asturianu o gallego-asturianu na programación del mediu: hasta un máximu de 20 puntos, estremando ente prensa escrita, radio/televisión y páxines web, señalándose:
- PRENSA ESCRITA:
- Extensión del espaciu escritu (máx. 10 puntos)
- Proyectu d'afechamente n'asturianu: 10 puntos.

- Proyectos con una extensión igual o superior al 50 % del espaciu escritu garrando como referencia'l total de la publicación: 7 puntos.
- Proyectos con una extensión inferior al 50 % del espaciu escritu garrando como referencia'l total de la publicación: 5 puntos.

Sitiu preferente de la páxina (máx. 5 puntos)

- Sitiu destacáu na publicación (portada o contraportada): 5 puntos.
- Sitiu non preferente na publicación: 2 puntos.

Frecuencia d'actualización (máx. 5 puntos)

- Frecuencia diaria, o de llunes a vienres: 5 puntos.
- Frecuencia mensual, anual o otres frecuencies: 2 puntos.

RADIO/TELEVISIÓN:

Extensión del espaciu faláu o emitíu (máx. 10 puntos)

- Proyeutu dafechamente n'asturianu: 10 puntos.
- Proyectos con una extensión igual o superior al 50 % del espaciu faláu garrando como referencia'l total de la programación: 7 puntos.
- Proyectos con una extensión inferior al 50 % del espaciu faláu garrando como referencia'l total de la programación: 5 puntos.

Horariu d'emisión (máx. 5 puntos)

- Horariu máxima audiencia: 5 puntos.
- Otros horarios: 2 puntos.

Díes d'emisión (máx. 5 puntos)

- Programa diariu o de llunes a vienres: 5 puntos.
- Díes alternos, selmanal, quincenal, etc.: 2 puntos.

PÁXINES WEB:

Extensión del espaciu escritu (máx. 10 puntos)

- Proyeutu dafechamente n'asturianu: 10 puntos.
- Proyectos con una extensión igual o superior al 50 % del espaciu escritu garrando como referencia'l total de conteníos: 7 puntos.
- Proyectos con una extensión inferior al 50 % del espaciu escritu garrando como referencia'l total de conteníos: 5 puntos.

Accesu al conteníu n'asturianu na estructura xeneral de la web (máx. 5 puntos)

- Acceso directu: 5 puntos.
- Acceso indirectu: 2 puntos.

Grau d'actualización (máx. 5 puntos)

- Actualización diaria: 5 puntos.
- Actualización non diaria: 2 puntos.

e) Interés y calidá del proyectu: va valorase nuna escala de 0 a 15 puntos la calidá de los contenidos del proyectu, atendiendo a aspectos como'l profesionalismu, la orixinalidá y innovación, l'usu del llinguaxe, la capacidá de representación de la realidá, la contribución al desarrollu de la cultura o la representatividá social.

f) Grau de corrección llingüística na realización del proyectu: hasta un máximu de 15 puntos.

- Escelente corrección ortográfica, sintáctica y riqueza léxica: 15 puntos.
- Bona corrección ortográfica, sintáctica y riqueza léxica: 10 puntos.
- Suficiente corrección ortográfica y sintáctica: 5 puntos.
- Insuficiente corrección ortográfica y sintáctica: 0 puntos.

9.-Pago de la subvención

1. Con calter xeneral, l'abonu de les subvenciones va facese desque se xustifique na forma qu'establez la base decimosesta de les bases reguladores de 13 de mayu del 2016, pente medies de tresferencia bancaria a la cuenta asignada pola persona beneficiaria.

2. A pesar de lo que se dispón n'apartáu anterior, con calter escepcional nesta convocatoria, y d'alcuerdu colo dispuesto nes bases XVI.2 y XVII.b de les bases reguladores de 13 de mayu del 2016, los proyectos subvencionaos por un importe inferior a seis mil diez euros (6.010 €) van pagase desque pasen 15 días hábiles de la publicación de concesión en BOPA, siempre que nun haya primero renuncia espresa del solicitante.

Les subvenciones d'importe superior a seis mil diez euros (6.010 €) van abonase depués de petición y presentación de garantía, d'alcuerdu colo dispuesto n'artículo 12 del Decretu 71/1992, de 29 d'ochobre, que regula'l Reglamentu Xeneral de Concesión de Subvenciones, nos términos de les resoluciones de la Conseyería de Facienda de fecha 19 de marzu y 30 de xunetu del 2001 de modificación de la Resolución de fecha 11 de febreru del 2000, poles que se regula'l Réxime de Garantías pal Abonu Anticipáu de Subvenciones.

En tolos casos, pa proceder al pagu de la subvención concedida ríquese la presentación del certificáu del órganu correspondiente qu'acréite tar al corriente de les obligaciones tributaries y cola Seguridá Social, y nun tener deudes cola Facienda del Principáu d'Asturies, quitando d'esta obligación cuando la cantidá de la subvención, por beneficiariu y añu, nun pase de 3.005,06 €, tal y como s'establez n'artículu 10.3 d) del Decretu 71/92, de 29 d'ochobre, en rellación cola base XIV.6.

En cualquier casu, l'abonu anticipáu de la subvención nun quita de la obligación d'acreditar en plazu'l cumplimientu de les condiciones establecées na resolución de concesión.

10.- Xustificación de la subvención

La xustificación ha facese na forma establecida na base XIV de les bases reguladores de 13 de mayu del 2016, pol sistema de cuenta xustificativa; en concreto, la llista clasificada de gastos y inversiones de l'actividá ha presentase según modelu que s'atopa disponible na ficha de serviciu publicada na sede electrónica del Principáu d'Asturies (<https://sede.asturias.es>). Pa localizala va poder metese'l códigu 2002114 nel buscador de la cabecera (asitiáu na parte cimera derecha de la páxina).

Como muestra de l'actividá subvencionada va haber que presentar copia de la totalidá de los exemplares impresos; nel casu d'actividaes de calter audiovisual, muestra de les grabaciones y certificaciones d'emisión, y nel casu de páxines web, muestra nun formatu que dexa visualizar el conteníu de la páxina en xeneral y los testos inxertaos.

El plazu máximu pa la xustificación de les ayudes concedíes va ser el 10 de payares del 2022.

11.- Revocación, reintegru y réxime de sanciones.

La revocación, reintegru y el réxime de sanciones va llevase alantre d'alguerdu colo que s'establez na base XIX de les bases reguladores de 13 de mayu del 2016.

Atendiendo a lo dispuesto na mentada base XIX, l'incumplimientu del proyectu superior al 50 % va suponer la revocación total de la subvención concedida.

Tercero.- Disponer la publicación del extractu d'esta convocatoria en *Boletín Oficial del Principáu d'Asturies (BOPA)*, pudiendo consultase'l testu completu de la mesma na Base de Datos Nacional de Subvenciones (<http://www.pap.minhap.gob.es/bdnstrans/index>), d'alguerdu colo previsto nos artículos 18.2 y 20.8.a) de la Llei 38/2003, de 17 de payares.

Esti actu pon fin a la vía alministrativa y contra él pue interponese:

- a) Recursu potestativu de reposición énte la consejera de Cultura, Política Llingüística y Turismu. El plazu pa la presentación d'esti recursu va ser d'un mes.
- b) Recursu contencioso-alministrativu énte la Sala de lo Contencioso-Alministrativu del Tribunal Superior de Xusticia del Principáu d'Asturies. El plazu pa la presentación d'esti recursu va ser de dos meses.

Estos dos recursos nun puen simultaniase y el plazu pa la so interposición va cuntase, en dambos casos, dende l'otru día de publicase esta resolución en *Boletín Oficial del Principáu d'Asturies* (d'alcuertu a lo estableció n'artículu 28 de la Llei del Principáu d'Asturies 2/1995, de 13 de marzu, sobre Réxime Xurídicu de l'Alministración del Principáu d'Asturies; y n'artículu 123 de la Llei 39/2015, de 1 d'ochobre). Too esto ensin perxiciu de que los interesaos puedan exercitar cualquier otu recursu que-yos paeza oportunu.